

Demonstratio  
composit. A-  
strolab.

newes das mittel Centrum in dem außgedreheten Circul/mit höchstem fleiß suchen/ vnd auff demselbigen Centro zwo Linien Creuxweiß vber einander ziehen/ ist so zu verstehen/ daß dieselbigen den außgedreheten Circel gerings herumb in vier gleiche Theile/welche Quadranten genennet werden/auftheilen.

Es soll aber die eine vnd Mittag lini oben von dem Gehenge herabwärts gezogen werden/ vnd wo dieselben Creuxlinien den Limbum Horarium antreffen/ daselbst sollen sie vollendt vber den Limbum gezogen werden/ vnd denn vollendt zu eufferst gleich just vber dem Rande der Dicke des Brets ziehen/ also/ daß sie auff der ander Seiten auch den euffersten Randt in 4. gleiche Theil abtheilen/ vnd da diese 4. Theile am euffersten Rande/ auff der ander Seiten hin treffen oder befunden/ von denselben sollen abermal zwo Linien Creuxweiß vber einander gezogen werden/ alsdenn wenn du es recht gemacht hast/ so soll der mittel Creuxpunct oder mittel Centrum dem Centro auff der andern Seiten ganz just respondiren oder antworten/ geschicht das nicht/ so hastu gefehlet/vñ muß es anders machen/daß diese Creuxlini auff beyden Seiten des Brets/ müssen just auff einander zutreffen/ wie du auß dem abdrucken wohl wirst sehen vnd verstehen können/ wenn du nun die Creuxlinien auff beyden Seiten des Brets ganz just gemacht hast/ also daß sie auff einander antworten/ so zieh zum ersten einen Abdruck einer Landtaffeln in das außgedrehte Spatium des Brets/ also solcher Gestalt/daß die Mittagslini derselben/oben an das Gehenge stosse/ vnd just auff die gemachten Creuxlini/ die du in das außgedrehte Spatium von dem Gehenge herabwärts gezogen hast/aufftreffe/oder komme/die ander Zwerchlini im Abdruck der Landtaffel/ der Horizon rectus muß auch alsdenn auff die ander gemachte zwerche lini/ die in das außgedrehte Spatium des Brets gerissen ist/ just zutreffen/ vnd dieses muß mit höchstem fleiß gemacht werden/also/ daß die Creuxlini in dem Abdruck just mitten auff die Creuxlini/die auff das außgedrehte Spatium des Brets gerissen ist/ just aufftreffe/ oder darauff zu liegen kommen/ wie du der einen Verstandt hast/ selbst wohl wirst erachten können/ wenn du nun eine Landtaffel in die außgedrehte Hölen geleimet oder gezogen hast/so schneidt auß dem Abdruck fein just herauß den Limbum Horarium, vnd ziehe denselbigen auch auff das Bretlein den euffersten Ransft/ also solcher Gestalt/ daß er gerings vmb die Landtaffel/die du außgezogen hast/gehe/ vnd daß die 12. Stunde oben vnd vnten/ geradt mitten vnter das Gehenge des Astrolabij, auff die Mittagslini der Landtaffeln/ die oben von dem Gehenge herabwärts gehet/ aufftreffe/ vnd die beyde 6. Stunden just auff die Zwerchlini den Horizontem rectum, an beyden Enden just aufftreffen/wie du in dem Abdruck/darauff der Limbus Horarius stehet/augenscheinlich sehen vñ verstehen wirst/vñ weiter davon zu schreibē/vnnötig ist. Nach diesem/ so du nun die Forderseiten der Landtaffeln/ vñ den Limbum mit fleiß just außgezogen hast/so nim denn für dich den andern Abdruck/den Dorsum des Astrolabij, vnd ziehe denselben auch mit allem fleiß auff die ander Seite der Fleche des Brets/

also sol-

Limbus Horar.

Dorsum Astro-  
labij.